

Piripos

Pawre kot Piripos kamã Jejus kôt hkwÿjê hwÿr kagà nê mēnh

Pawre na pre kagàja nhîpêx. Jejus nhÿ hã mē ahkre o mē pa xwÿnhjê hõ na pre. Na pre Jejus ã mē kãm hkurê xwÿnhjaja unê nê ma krî pê Rôm wÿr kumê nê kamã haxà nhũm mē hagjênh xà kamã hkrî ho hkrî. Tã nhũm arî hkrî rãhã Piripos kamã Jejus kôt hkwÿjê hwÿr kagàja nhîpêx nê kumê. Na prem Pawre jarênh ma nê kãm ukaprî nê. Jakamã axpên kaxyw kãxpore hkwÿ ho akuprõ nê hwÿr kumê. Hãmri nhũm omu nê hkînh nê amnhî tã kagàja nhîpêx nê kamã mē kãm amnhî jarê nê mē hwÿr kumê. Kot amnhî xà htÿx kamã hamak o hkrî htã arî hwÿr mē mrar xwÿnhjê mã Tirtũm kapêr jarênh rãhã ho hkrî hã amnhî jarê. Nê kãm Jejus kot amnhî nhîpêx kôt pix mã amnhî nhîpêx o pa hprãm ã amnhî jarê. Nê kãm Jejus jamaxpêr kôt pix mã hamaxpêr prãm ã amnhî jarê. ã na pre Pawre kagàja kamã mē kãm amnhî jarênh anê. Nê mē kãm:

¹ Pa Piripos kamã Jejus Kris kôt ixkwÿjjaja. Xà mē amex na ka mē apa? E ixpê Pawre na pa mē amã kagàja nhîpêx nê kamã mē amã amnhî jarê nê mē awÿr kumê. Nhũm Ximotre haxwÿja kãm ja mex nê. Wa ixpê Jejus mã tanhmã amnhî nhîpêx to ho wa ixpa xwÿnh jakamã na pa wa mē awÿr hipêx nê kumê. Mē ate Tirtũm kapêr o mē ajahkre xwÿnhjê hwÿr nê mē kãm mē ate tanhmã amnhî to xwÿnhjê

hwỳr nẽ mẽ ate mẽ mar o akrĩ xwỳnhjê hwỳr. Mẽ apê Kris kôt wa ixtõ nẽ wa ixtõxjê ho ixpimràatã mẽ awỳr hipêx nẽ kumẽ.

² E kê Mẽpanhĩpêêxà maati Tĩrtũm mẽ Pahшти Jejus Kris wa mẽmoj to mẽ akutã nojarêr rãhã nẽ ka mẽ axàmnhĩx ri ajamakêtkati nẽ ri apa ho apa.

Pawre kot Piripos nhõ xwỳnhjê ho Tĩrtũm wỳr ã harẽnh

Epes 1.15-19; Korosẽ 1.9-12

³ Na pa hte xatã mẽ amã ijamaxpêr o ixkrĩ nẽ mẽ panhõ Tĩrtũm kot tanhmã mẽ ato mex toja pa kãm ijamaxpêr nẽ ixkĩnh nẽ ixkrĩ.

⁴ Nẽ Tĩrtũm mã mẽ ajarẽnh nẽ mẽ ato kuwỳ. Ixkĩnh kãm mẽ ato kuwỳ.

⁵ Wam ixte mẽ awỳr inhmõrta ã na pa pre mẽ amã Jejus kot mẽ panẽ tanhmã amnhĩ nhĩpêx to hã harẽnh o ri mẽ akôt ixpa. Ka prem inhma nẽ hkôt amnhĩ xunhwỳr tỳx nẽ hkôt amnhĩ nhĩpêx o ri apa. Jakamã inhmã axpêr kaxyw ri kàxpore hkwy nhõr o apa. Te ham mẽ ate ixwỳr mẽnhta pyræk pa pre mẽ akukwak ri amnhĩm ho ixujaprõr o ri ixpa pê nhãm ri mẽ kãm Jejus jarẽnh o ri mẽ hkôt ixpa. Na pa hte arĩ jam ijamaxpêr rãhã ho ixkĩnh nẽ ixkrĩ. Nẽ Tĩrtũm mã mẽ ate ixto mex ã kãm mẽ ajarẽnh o ixkrĩ.

⁶ Nẽ na pa pre ma mẽ awỳr mõ nẽ mẽ amã Jejus jarẽ ka prem inhma nẽ hkôt amnhĩ xunhwỳ nhũm Tĩrtũm ja hã mẽ apumunh mex nẽ. Hãmri nẽ mẽ ate hkôt amnhĩ to htỳx kaxyw tanhmã mẽ ato mẽ axihtỳx to. Tã koja arĩ mẽ ato mẽ axihtỳx rãhã nhũm Jejus Kris nhỹrmã akupỹn mẽ pahwỳr wrỳ. Koja ã mẽ ato mex anẽ.

⁷ Na hte tanhmã ixto mex tota pyrã nẽ tanhmã mẽ ato mex to ho pa nẽ mẽ akutã nojarêt rãhã ho pa.

Nẽ kormã mẽ kot ijaxàr kêt ri pa pre ma mẽ piitã mẽ kãm Jejus jarẽnh o ri ixpa. Nẽ ãm hãmri mẽ kãm harẽ. Mẽ kot mar nẽ hkôt amnhĩ xunhwÿr tÿx kaxyw pa pre mẽ hkôt harẽnh rãhã ho ri ixpa. Ka prem ja kaxyw inhmã kàxpore hkwÿ gõ pa pre ho amnhĩm ixujaprôr pê mẽ hkôt ri mẽ kãm harẽnh o ri ixpa. Tã nhũm prem jar Rõm kamã ijaxà pa arĩ ixkrĩ htã ka mẽ axte ixwÿr hkwÿ mẽ. Jakamã na pa hte mẽ amã ijamaxpër rãhã ho ixkrĩ nẽ inhmã mẽ akĩnh tÿx nẽ.

⁸ Te Jejus Kris kãm mẽ ajapê htÿx pyrãk. Tĩrtũm kot ja hã ixpumunh mex.

⁹⁻¹⁰ Na pa hte mẽ ato kuwÿ nẽ kãm:

—Pa Tĩrtũm. E Piripos nhõ xwÿnhjê pumu. Na mẽ ra kãm axpẽn kĩnh o axpẽn kôt pa. Kwa tanhmã mẽ hipêx to kê mẽ arĩ kãm axpẽn kĩnh tÿx pix nẽ. Jao axpẽn to mex rãhã ho pa. Nẽ tanhmã mẽ hkrã hto kê mẽ amnhĩ krãm akapër jaxàr tÿx nẽ. Jao tãm amnhĩ nhĩpêx mex nẽ hamaxpër mex o ri pa. Nom kormã mẽ kot ja pumunh tohtuj anhÿr. Tã kêr ka tanhmã mẽ ho kê mẽ ã amnhĩ nhĩpêx anhÿr rãhã Jejus Kris akupÿn mẽ ixwÿr wrÿ.

Anhÿr pa hte mẽ ato hwÿr o ixpa.

¹¹ Nã koja Jejus Kris mẽ akaxwÿnh kãm mẽ ato mẽ axihtÿx ka mẽ ÿ hã axihtÿx pê tãm ri amnhĩ nhĩpêx nẽ tãm axpẽn nhĩpêx o ri axpẽn kôt apa. Nhũm mẽ piitã ja hã mẽ apumu nẽ axpẽn mã Tĩrtũm mex o mex ã harẽ.

*Pawre kãm Kris kôt amnhĩ nhĩpêx prãm ã harênh
Atre 28.30-31; Epes 6.19-20; Sikũn Ximotre 2.9*

¹² E Kris kôt ixtõ nẽ ixtõxjaja. Kot paj mẽ amã tanhmã amnhĩ jarênh to ka mẽ inhma. Na prem ra Jejus ã ixtomnuj tỳx nẽ hã ijaxà pa amnhĩ xà htỳx kamã ijamak o ixkrĩ. Nom mẽ kot ã inhĩpêx anhỹr tã pa hte arĩ ixkrĩ xà kamã mẽ kãm Jejus jarênh o ixkrĩ. Jakamã na mẽ ra ohtô nẽ tanhmã kot mẽ panê amnhĩ nhĩpêx to hã harênh ma.

¹³ Pôristi kot inhĩhkô hã ixtãnopxar xwỳnhjê mẽ ixwỳr mẽ mrar xwỳnh piitã ixte Kris kapêr jahkre ho ixpa pix ã mẽ kot ijaxà ã ijarênh ma.

¹⁴ Nẽ jar Kris kôt mẽ pahtõ nẽ mẽ pahtõxjaja haxwỳja ijarênh ma nẽ ohtô nẽ ixpyrà nẽ Kris nhỹ hã amnhĩ to htỳx nẽ arĩ hkwỳjê mã kapêr jarênh rãhã ho pa. Ixpyrà nẽ kãm mẽ uma hkêt nẽ mẽ kutã amnhĩ to htỳx pẽ mẽ kãm harênh rãhã ho pa.

¹⁵⁻¹⁸ Nẽ na pre mẽ hkwỳjaja ixte mẽ amã Kris jarênh o ixpa hã ijarênh ma nẽ hã ixkamã gryk nẽ axtem hamaxpêr nẽ ixwakre kamã gryk kãm mẽ kãm Kris kapêr jarênh o pa. Na htem hamaxpêr o:

—E kot paj ma Pawre kot ra mẽ hwỳr mõi xwỳnhjê hwỳr mõi nẽ kot ra mẽ kãm Jejus kapêr jarênh nhĩpy axte mẽ kãm harênh o ri mẽ hkôt ixpa. Hãmri nhũm mẽ inhma nẽ inhgryk ã Pawre kaga. Hãmri nhũm mẽ hagiênh xà kamã arĩ hkrĩ tã tee ri mẽ hã ijarênh ma nẽ hkaprĩ nẽ rĩ amnhĩ pumu. Nà kot paj anẽ.

Anhỹr o hamaxpêr tã pa mẽ harênh ma nẽ ixkaprĩ hkêt nẽ. Mẽ kot mẽ amã hprĩ hã Kris kapêr jarênh kênã kot pa kêt tee ri mẽ harênh ma nẽ ixkaprĩ. Kwãr mẽ mãmri ri ixkamã gryk kãm kapêr

jarēnh o ri pa. Pa mẽ harēnh ma nẽ ixkĩnh nẽ. Nom na hte mẽ hkwỳjaja jajê rom kãm ixkĩnh kãm mẽ kãm Kris kapēr jarēnh o pa. Nẽ tãm hamaxpēr pẽ mẽ kãm harēnh o pa. Ra mẽ kot ixpumunh mex jakamã nhũm Tĩrtũm kot jar mẽ hwỳr inhmēnh nhũm ixte ãm hãmri mẽ kãm kapēr mex jarēnh o ri ixkrĩ hã ixpumunh mex. Jakamã kwār mẽ mãmri tanhmã inhmã hamaxpēr to xà hkôt mẽ ujarēnh mexja jarēnh o pa. Mẽ kãm ixkĩnh kãm harẽ rỳ ixkamã gryk kãm ri harēnh o pa. ãm hãmri Kris kapēr jarēnh o pa jakamã pa mẽ harēnh ma nẽ ixkĩnh nẽ.

¹⁹ Nẽ ra mẽ ate ixto Tĩrtũm wỳr o apa jakamã koja Karōja ixkaxyw tanhmã jar Rõm kamã pahĩhti nhĩpêx to nhũm tokyx ixkator japêr. Pa ixãmnhĩx ijamakêtkati nẽ ri ma mẽ akôt ixpa.

²⁰ Nom inhmã Jejus kãm hprãm xà hkôt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh nẽ arĩ kãm tanhmã amnhĩ nhĩpêx to ho ri ixpa. Nom koja mẽ tanhmã hamaxpēr to nẽ ixpĩ pa mẽ kutã mẽ kãm amnhĩ to htỳx nẽ ixãm rãhã nhũm mẽ ixpĩ pa ijamakêtkati nẽ ty. Kê mẽ ja hã ixpumu nẽ ixtã Kris mex o mex ã harẽ. ãm Jejus kãm hprãm xà hkôt pix mã na inhmã amnhĩ nhĩpêx prãm.

²¹ Tã kot paj tanhmã amnhĩ to nẽ arĩ ixtĩr japêr hã kot paj ãm kôt pix mã amnhĩ nhĩpêx rãhã ho ixpa. Nom koja mẽ tanhmã hamaxpēr to nẽ hã ixpĩ pa ty nhũm Tĩrtũm ma kaxkwa hwỳr ixkarõ ho àpir kurẽ kumrêx. Pa Tĩrtũm mẽ Krata wa kuri inhmex o inhmex nẽ wa kuri ixpa ho ixpa.

²²⁻²³ Tã nhỹ na we inhmã mex o hõ jakrenh wehe? Na pa tee ri amnhĩ kukamã ijamaxpēr.

Inhmã tokyx ixtyk nê Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nê arĩ mẽ kãm Jejus kot tanhmã mẽ panê amnhĩ nhĩpêx to hã harênh rãhã ho ri ixpa. Ko. Ja mããnên inhmã mex.

²⁴ No mẽ amã na arĩ ixtĩr nê ixpaja mẽ amã hprãm

²⁵ jakamã kot paj pěr tokyx ixtyk kêt nê. Kot paj arĩ ri mẽ amã Kris kôt mẽ ato mẽ axihtỳx o ri mẽ akôt ixpa. Jao ãm ho hkrãnre ka mẽ ra amnhĩ kaxyw kãm ajamaxpěr nê hkôt amnhĩ xunhwỳr tỳx nê. Jao akĩnh nê apa.

²⁶ Tã kot paj nhỹrmã akupỳm ixtĩr rãhã mẽ awỳr mỗ ka mẽ ixpumu nê akĩnh nê. Jejus Kris kot akupỳm ixkator ã akĩnh nê. Hãmri nê ixtã Jejus mã mex o mex ã harê.

Mẽ pahte Jejus ã pahpunuj tã mẽ pahte amnhĩ to htỳx ã mẽ pamã karõ

Rukre 6.22; Sikũn Korĩt 2.14-16; Xiakre 1.12; Jutre 3

²⁷ Jakamã e kêt ka mẽ Jejus Kris kapěr kôt pix mã amnhĩ nhĩpêx. Nê axpẽn kôt axpẽn to axihtỳx pê mẽ kãm Jejus kot tanhmã mẽ panê amnhĩ nhĩpêx to hã harênh o ri apa kê mẽ ama nê mẽ pahpyrà nê hkôt amnhĩ xunhwỳ. E kêt ka mẽ ã amnhĩ nhĩpêx anhỹr o ri apa. Kêr pa nhỹrmã mẽ hagjênh xàja rũm ixkator japêr nê nhỹri ja hã mẽ ajarênh ma rỳ ma mẽ anhõ krĩ hwỳr mỗ nê ja hã mẽ apumu nê ixkĩnh nê.

²⁸ Nom kwa kêt ka mẽ amã mẽ kot Kris ã tanhmã mẽ ato xwỳnhjê pyma hkêt nê. Mẽ kot tanhmã mẽ anhĩpêx kati hto htã kêt ka mẽ kutã amnhĩ to htỳx

ně mẽ hkôt apa. Kêr kê mẽ amnhĩ tã mẽ apumu ně tee ri hamaxpêr hãmri ně axpên mã:

—Kwa mẽ pahte Kris ã tanhmã mẽ hipêx to htã na htem amnhĩ to htỳx ně arĩ mẽ pamã harênh o ri pa. Pêr mẽ kãm mẽ pahpyma hkêt. Mãn hte Tĩrtũm tanhmã mẽ ho nhũm mẽ ỹ hã kãm mẽ pahpyma hkêt nà? Kwa tanhmã kot puj mẽ ho nhũm mẽ Jejus kapêr jarênh o pata kaga? Nà kot puj mẽ âm tee ri hã tanhmã mẽ ho kaprỳ. Mãn âm hãmri na htem nhỹrmã Tĩrtũm kuri htĩr tũm ně pa ho pa hã amnhĩ jarênh o pa nà? Aně.

Koja mẽ ã mẽ ajarênh aně. Tĩrtũm kot mẽ ato mẽ axihtỳx ã mẽ apumunh kôt.

²⁹ Na pre tanhmã mẽ ato ka mẽ Kris kôt amnhĩ xunhwỳ. Tã mẽ kot tanhmã hã mẽ anhĩpêx to htã na hte Tĩrtũm mẽ kutã tanhmã mẽ ato ka mẽ ỹ hã amnhĩ to htỳx ně apa.

³⁰ Ijaxwỳja na pa hte amnhĩ xà htỳx kamã ijamak o ixkrĩ. Na pre htem Jejus ã ixtomnuj o pa ka prem ja hã ijarênh ma ně hã ixpumu. Tã ota kê mẽ ra axte tanhmã hã inhĩpêx to. Pa kê amnhĩ xà htỳx kãm ijamak o ixkrĩ ka mẽ ijarênh ma. Tã xep mẽ ixpyrà ně Kris ã amnhĩ xà htỳx kamã ajamak o apa. Nom kwa kêr ka mẽ tee ri amnhĩ kukamã ajamaxpêr o akaprĩ ně apa hkêt ně.

2

Jejus kãm mẽ pajapê xàj tanhmã kot amnhĩ nhĩpêx to hã harênh

Rômãn 15.5-6; Epes 4.1-6; Piripos 2.18

¹ Ně ra mẽ pahte Jejus kôt amnhĩ xunhwỳr jakamã pu mẽ tee ri amnhĩ kukamã pajamaxpêr o

pahkaprĩ nẽ ri papa hkêt nẽ. ãm kãm mẽ pajapêja mã pajamaxpêr rãhã ho pahkĩnh nẽ pajamakêtkati nẽ ri papa. Nhũm Karõ mẽ pahkarõ mã agjê nẽ mẽ pahto mex nẽ mẽmoj to mẽ pakutã nojarêto o ri mẽ pakamã pa.

² Tã kêr ka mẽ axpẽn mar mex nẽ mẽmoj tã axpẽn mã axàkjêr o ri apa hkêt nẽ. Te ri ixkre pixi kamã mẽ atixi nẽ axpẽn kôt amnhĩ nhĩpêx pyræk. Nẽ Tĩrtũm kãm hprãm xà hkôt pix mã ajamaxpêr o ri apa. Nẽ mẽ amã axpẽn kĩnh o ri apa. Kot kaj mẽ ã amnhĩ nhĩpêx anẽ pa ja hã mẽ apumu rỳ hã mẽ ajarênh ma nẽ ixkĩnh tỳx kumrêx.

³ Nẽ kwa kêr ka mẽ axpẽn pumu nẽ ã ajamaxpêr anhỹr kêt nẽ. Mẽ ajamaxpêr o:

—Tk. Kot pa ri tanhmã jahti ho ajuta hto ho ixpa hkêt nẽ. Ixte amnhĩ to rax o hakrenh kênã kot pa hkêt ri ho ajuta. Kê tãm mãn tanhmã ixto ajuta hto.

Anhỹr o ajamaxpêr kêt nẽ. Kêt nhỹri mēhõ pumu nhũm tanhmã kute ka hã omu nẽ ajamaxpêr o:

—Hêxta waa nẽ. Kwa tanhmã kot pa we ho ajuta htoo?

Anhỹr o ajamaxpêr hãmri nẽ ajamaxpêr xà hkôt tanhmã ho ajuta hto.

⁴ Jao Jejus pyrã nẽ mẽmoj to axpẽn kutã anojarêto o ri apa. No ri amnhĩ pix kukamã ajamaxpêr o apa hkêt nẽ.

⁵ Kêr pu mẽ te Jejus tanhmã hamaxpêr toja pyræk o pajamaxpêr o ri papa.

⁶ Kêp Tĩrtũm Kra kumrêx jakamã te uræk tã xà na pre ja hã amnhĩ pumu nẽ amnhĩ pix kukamã ã hamaxpêr anẽ nẽ hamaxpêr o:

Te ixte Tĩrtũm pyræk jakamã mẽmoj piitã inhõ na. Jakamã kot paj jar kaxkwa kamã inhmex

ně ixkĩnh ně ixpa ho ixpa ně aa rer ně
nhỹhỹm inhmõr kêt kumrẽx. Anhỹr o na pre
hamaxpěr? Nà na pre ã hamaxpěr anhỹr kêt
ně.

7-8 Kãm mẽ pajapê xàj na pre kaxkwa kamã mẽmoj
mex piitã rer pa ně man mẽ pahwỳr wrỳ ně
mẽ pahpyrà ně ĩ ho katorxà nhõhy rũm kato.

Kêp mẽ panhõ Pahihti htã te kêp mẽ panhĩo ně te
kot amnhĩ to grire pyræk o amnhĩ nhĩpêx o
ri pa.

Ně Tĩrtũm kãm hprãm xà hkõt pix mã amnhĩ
nhĩpêx o pa.

Ně ãm kõt pix mã amnhĩ nhĩpêx o pa rãhã nhũm
prem kupĩ nhũm arĩ mẽ kãm xa ně tanhmã
amnhĩ tã mẽhõ hto hkêt ně.

Na prem hipêx kati ně. Te kêp mẽ kot amnhĩ
tomnuj tỳx xwỳnhjê nhĩpêx pyræk o hipêx ně
pĩ kahpa hã kunhõ ně kupĩ.

Tã no nhũm mẽ kêp tanhmã amnhĩmnuj to hkêt ně
arĩ mẽ kãm xa. Mẽ panê na pre ã amnhĩ
nhĩpêx anẽ.

9 Hãmri nhũm Tĩrtũm ã kot amnhĩ nhĩpêx anhỹr ã
omu ně akupỹm ho htĩr ně akupỹm amnhĩ
wỳr ho api.

Ně mex o mex ã harẽ.

Ně kot nhỹrmã mẽ pahpiitã mẽ pahto amnhĩptàr
kaxyw mẽ pakaxyw ãm.

10 Jakamã kot puj mẽ nhỹrmã pahpiitã Jejus kutã
pahkõnkrã ho rôrõk ně pahkrĩ hpa ně kàx
pêê kãm mex o mex ã harẽ.

Mẽ pahpiitãã. Kaxkwa kamã mẽ pa xwỳnhjaja ně
pika piitã hkõt mẽ papa xwỳnhjaja.

Ně mẽ htyk xwỳnh piitã koja mẽ akupỳn htĩr pu mẽ pahpimràatã Jejus kutã pahkõnkrã ho parõrõk nẽ pahkrĩ hpa nẽ kãm mex o mex ã harẽ.

¹¹ Nẽ kãm:

Pa Pahihti Jejus. Nà ãm hãmri na apê mẽ inhõ Pahi Maati hã apyxi mex na ka.

Jakamã mẽ ixtõ kot paj mẽmoj tã tanhmã amã karõ hto? Nà kot paj mẽ ixtõ ã amnhĩ nhĩpêx anhỹr kêt nẽ. Anẽ.

Kot puj mẽ nhỹrmã ã Jejus mã pakapěr anẽ.

Jao mããnẽn Tĩrtũm hihtỳx o hihtỳx nẽ àhpumunh o àhpumunh ã omu. Nẽ mex o mex ã omu.

Te mẽ pahpê kanhêti pyràk ã mẽ pajarẽnh

Matêwre 5.14-16

¹²⁻¹³ Tã kwa ixkràmnhwỳjaja. Inhmã mẽ akĩnh. Kwa kêr ka mẽ arĩ Tĩrtũm kõt amnhĩ nhĩpêx mex rãhã nẽ. Te ixte mẽ akamã ixpare ri mẽ ate amnhĩ nhĩpêx mexta pyràk o ixwakre kamã amnhĩ nhĩpêx mex o ri apa. Na pre ra Tĩrtũm mẽ panê mẽ pahte amnhĩ tomnuj rê nẽ tanhmã mẽ pahto pu mẽ ỹ hã kapěr kõt amnhĩ nhĩpêx o ri papa. Jakamã kwa kêr pu mẽ axte tanhmã amnhĩ tomnuj to ho papa hkêt nẽ. Nẽ mẽ pahte Tĩrtũm kapěr kwỳm ri amnhĩ nhĩpêx pymaj ãm hkõt pix mã amnhĩ nhĩpêx o ri papa.

¹⁴ Nẽ kêr ka mẽ mẽmoj to anhỹr kaxyw nẽ agryk kãm tanhmã ri ho hkêt nẽ. Nẽ mẽmoj tã axapênh kaxyw nẽ ri hã axpẽn mã akapěr kati kamã ho anhỹr kêt nẽ.

¹⁵⁻¹⁶ Mẽ kot amnhĩ tomnuj xwỳnhjaja na htem ã amnhĩ nhĩpêx anhỹr o pa. No kêt mẽ kajaja. Mẽ ate mẽ hkõt apa htã kêr ka mẽ hkõt amnhĩ

nhĩpêx kêt nê. Mẽ kurom mẽ apê Tĩrtũm kra jakamã kêr ka mẽ hkôt pix mã amnhĩ nhĩpêx o ri apa. Nê tanhmã amnhĩ tomnuj to rỳ tanhmã ajamaxpêr punuj to hkêt nê. Mẽ kot amnhĩ tomnuj xwỳnhjaja te ri kamàt kô kamã ri mẽ kêp àhkĩnh o ri mẽ pa xwỳnhjê kot amnhĩ nhĩpêx pyràk. Tã kot kaj mẽ hkôt tãm ri amnhĩ nhĩpêx o apa nê te ate kanhêtija kamàt kô kamã hirã ho harir pyràk o amnhĩ nhĩpêx. Jao mẽ kãm Tĩrtũm kapêr jarênh o ri mẽ hkôt apa. Mẽ kot amar nê apyrà nê nhỹrmã kuri htĩr tũm nê pa ho pa kaxyw. Kot kaj mẽ ã amnhĩ nhĩpêx anê nhũm nhỹrmã Jejus Kris akupỳn mẽ pahwỳr wryk ã arĩgrota ã pa mẽ apumu nê ixkĩnh nê. Nê ixkĩnh kãm Jejus mã mẽ ajarê nê kãm mẽ ajarênh o:

—Kwa Pahiti. E jajê pumu. Na pa pre mẽ kãm akapêr jarênh o ri mẽ hkôt ixpa nhũm mẽ inhmar tỳx nê nê akapêr kôt amnhĩ nhĩpêx o ri pa. Jakamã na pa pre mẽ kãm akapêr jarênh kaprỳ hkêt nê.

Anhỹr o kãm mẽ ajarê.

¹⁷ Na pa pre mẽ akôt mẽ amã Tĩrtũm kapêr jarênh o ri ixpa ka prem inhma nê hkôt amnhĩ xunhwỳ. Jakamã te ixte Tĩrtũm mã mẽ ato ixkĩnh xà nê kãm mẽ anhôr pyràk.

Nê koja jar Rôm nhõ pahitija tanhmã ixto hkêt japêr. Rỳ tanhmã ixto. Nom kwār mẽ mãmri tanhmã kãm ixto hprãm xà hkôt tanhmã ixto rỳ xpi. Koja mẽ ã ixte mẽ anhĩpêx anhỹr ã xpi pa ixkĩnh nê. Nê tanhmã ijamaxpêr to hkêt kãm ty. Jakamã na pa ra ã mẽ kot inhĩpêx anhỹrja kukamã mẽ amã amnhĩ kĩnh ã amnhĩ jarê ka mẽ inhma.

¹⁸ Tã kêr ka mẽ ixpyrà nê ajaxwỳja ixtã akĩnh nê apa.

Ximotre mẽ Eparoxit wa harẽnh

¹⁹ Nẽ koja Pahihti Jejus kãm ja prãm hã kot paj ma mẽ awỳr Ximotre mẽ nhũm ma mẽ awỳr mỗ nẽ ri mẽ akõt pa nẽ tanhmã mẽ ate amnhĩ nhĩpêx to hã mẽ apumu. Hãmri nẽ man akupỹn ixwỳr mỗ nẽ inhmã mẽ ajarẽ pa mẽ ajarẽnh ma nẽ ixkĩnh nẽ tee ri mẽ akukamã ijamaxpěr o ixkrĩ hkêt nẽ. ãm tãm mẽ akukamã ijamaxpěr o ixkrĩ.

²⁰ Ximotre tapxipix na ixpyrà nẽ kãm mẽ akĩnh nẽ kãm mẽ ato ajuta hprãm. Na hte mẽ ajarẽnh rãhã ho pa.

²¹ Nom jar mẽ piitã Ximotre kĩnhã amnhĩ mex pix kukamã hamaxpěr o pa nẽ kãm Jejus Kris kôt tanhmã amnhĩ nhĩpêx to ho pa hprãm kêt nẽ.

²² Ximotre te kệp ixkra pyræk. Na hte ixkõt pa nẽ ixpyrà nẽ Jejus mã tanhmã amnhĩ nhĩpêx mex to ho pa. Pa pre wa ijamẽ mẽ kãm mẽ ujarẽnh mex jarẽnh o wa ri mẽ hkõt ixpa.

²³ Tã koja mẽ tanhmã ixtã axpẽn mar to. Apu mẽ kot ixpĩr ã amnhĩ jarẽ rỳ ixkator ã amnhĩ jarẽ. Pa tanhmã amnhĩ tã mẽ mar to nẽ rĩ kormã ma mẽ awỳr Ximotre mẽ kê ma mẽ awỳr mỗ nẽ mẽ amã tanhmã ijarẽnh to.

²⁴ Nẽ koja Pahihti Jejus kãm ja mex pa ijaxwỳja ma mẽ awỳr mỗ pu mẽ axte axpẽn pumu.

²⁵ Nẽ kot paj tokyx ma akupỹm mẽ awỳr Kris kôt mẽ pahtõ Eparoxit mẽ. Na ka prem kãm kàxpore gõ nhũm man ixwỳr o mỗ nẽ inhmã kugõ. Hãmri nẽ jar inhmã àpẽn rax nẽ ixpyrà nẽ mẽ ujarẽnh mexja jarẽnh o pa.

²⁶⁻²⁷ Tã ra à htỳx nẽ. Kironhỹx pre mẽ pahpê ty. Tã nhũm Tĩrtũm omu nẽ kamã ukapĩ nẽ. Nẽ

mãänñen pa ixkamã ukaprĩ nẽ. Nẽ tee ri ixte à htỳx ã omunh nẽ ixkaprĩ htỳx pymaj akupỹm inhmã ho mex nhũm ra akupỹm mex nẽ ri pa. Hãmri nẽ kãm mẽ apumunh prãm nẽ. Mẽ ate à htỳx ã harẽnh mar nẽ akaprĩ hã mẽ ajarẽnh ma nẽ tee ri mẽ akukamã hamaxpẽr.

²⁸ Jakamã inhmã akupỹm tokyx mẽ awỳr mẽnh prãm. Tã koja mẽmo arĩgro hã mẽ awỳr pỏj ka mẽ omu nẽ akĩnh nẽ tãm ajamaxpẽr. Pa ijaxwỳja jar ixkĩnh nẽ tãm ijamaxpẽr.

²⁹⁻³⁰ Na ka prem ixwỳr amẽ nhũm man ixwỳr mỗ nẽ jar ixri mẽ kãm Kris kapẽr jarẽnh o ri mẽ hkôt pa rãhã nhỹx hã ty nom kot amnhĩ kamã kahak kêt. Jakamã kê akupỹm mẽ awỳr pỏj ka mẽ omu nẽ akĩnh nẽ. Nẽ kahti hkôt amỳ nẽ ho mex nẽ. Kêp Kris kôt mẽ pahtỗ mex kênã. ã na htem Kris mã mẽ kot tanhmã amnhĩ nhĩpêx to ho mẽ pa xwỳnhjê nhĩpêx mex anhỳr o pa.

3

Mẽmoj tã mẽ pahpumunh kôt Tĩrtũm kot tãm mẽ paxunhwỳr ã harẽnh

Piripos 2.18, 4.4

¹ E Kris kôt ixtỗ nẽ ixtỗxjaja. Kris kêp mẽ panhỗ Pahihti jakamã kwa mẽ jam ajamaxpẽr nẽ akĩnh rãhã ho ri apa.

Na pa ra mẽ amã mẽmoj jarẽnh rax nẽ. Nẽ hã kagà rax tã kormã inhmã ja ho anhỳr kaga hkêt nẽ. Kot paj axte mẽ amã hkwỳ hã kagà. Mẽ ate hã ano htỳx nẽ ho apa kaxyw.

² Jakamã e kwa mẽ okora. Kêr ka mẽ amnhĩ nẽ mẽ kot Tĩrtũm kapẽr o hêx xwỳnhjê pumunh mex

o ri apa. Na htem tanhmã mẽ amã kapër ho pa nẽ mẽ amã:

–Kot kaj mẽ ixpê Ijaewjê pyrà nẽ amnhĩ my kwryt kà jakà hãmri nẽ apê Tĩrtũm kra. Anẽ.

³ Nom ja kot anhỹr kêt. Mẽ pahte amnhĩ jakàr kôt mẽ pahpê Tĩrtũm kra hkêt. ã kot anhỹr ronhỹx pu mẽ amnhĩ krã hkôt tanhmã amnhĩ nhĩpêx to ho pahpê hkra. Nom ja kot anhỹr kêt. Mẽ ate amnhĩ jakàr kêt tã mẽ ixpyrà nẽ amnhĩ kaxyw Jejus Kris mã ajamaxpêr jakamã mẽ ixpyrà nẽ mẽ apê Tĩrtũm kra na ka mẽ. Na ka htem mẽ ixpyrà nẽ Karõ nhỹ hã kãm mex o mex ã harênh o ri apa nẽ mẽ ixpyrà nẽ Jejus kukwak ri akĩnh nẽ ri apa. Nom na pu htem pahpê hkra kaxyw amnhĩ jakàr kêt nẽ.

⁴ Kop ãm amnhĩ krã hkôt mẽ pahte amnhĩ to Tĩrtũm kra ronhỹx pa ra amnepêem amnhĩ to hkra nẽ ri ixpa. Na pa pre ixpê hkra hprãm xàj amnhĩ krã hkôt tanhmã ri amnhĩ nhĩpêx to rax o ixpa nom ã amnhĩ nhĩpêx anhỹr kaprý. E pa ja hã mẽ amã amnhĩ jarê ka mẽ ijarênh ma.

⁵ Na pa pre ixkato nẽ kormã ixtã semãn pixire nhũm mẽ ixpê Ijaew ã inhmy kwryt kà krãhta. Nom pa ã mẽ kot inhĩpêx anhỹr kôt ixpê Tĩrtũm kra hkêt nẽ. Nẽ inhĩpêxà hkôt ixpê finat Pějãmĩ kanrêhã htãmnhwý jakamã ixpê Ijaew mex na pa. Nẽ Ijaew kapër o ixkapër o ri ixpa. Nom ja kôt ixpê Tĩrtũm kra hkêt. Nẽ mãânên ixpê Parijew nhõ xwýnh jakamã na pa pre Tĩrtũm kot finat Mojes mã mẽ pakaxyw mẽmoj tã karõ kôt pix mã amnhĩ nhĩpêx o ixpa hprãm.

⁶ Jao tee ri mẽ kot Jejus kôt amnhĩ nhĩpêx xwýnhjê pumu nẽ mẽ homnuj tỳx o ri ixpa. Na pa pre ijamaxpêr o: “Nà mũjjaja na htem mẽ ixkwým

ri amnhĩ nhĩpêx o pa.” Anê nê mẽ hipêx kati ho ri ixpa. Nê ijamaxpêr o: “Ra ixte finat Mojes kot Tĩrtũm nhỹ hã kapêr piitã hkôt amnhĩ nhĩpêx mex jakamã na pa hte tanhmã ri amnhĩ tomnuj to ho ri ixpa hkêt nê.” Anê.

⁷ ã na pa pre ixpê Tĩrtũm kra hprãm xàj amnhĩ nhĩpêx anhỹr o ixpa. Tã nom ãm ã amnhĩ nhĩpêx anhỹr hkapyr. Na htem ã ri amnhĩ nhĩpêx anhỹr kôt kêp Tĩrtũm kra hkêt nê. Tã pa hpãnhã amnhĩ kaxyw Kris kôt ijamaxpêr nhũm ixto hkra kurê kumrêx.

⁸ Ra ixte Jejus Kris kôt amnhĩ xãm jakamã Jejus kêp inhõ Pahĩti pa inhmã kapêr kôt pix mã amnhĩ nhĩpêx o ri prãm. No hkrax rũm ixte amnhĩ nhĩpêx tũmja na pa ra Jejus gryk ã hkaga hpa. Te ixte mẽmoj punuj pyr nê amnhĩ katut kôt mẽnh nê axte kãm ijamaxpêr kêt pyræk. Jao amnhĩ kaxyw Jejus kôt pix mã ijamaxpêr o ri ixpa.

⁹ Nom kormã ã ijamaxpêr anhỹr kêt ri na pa pre ixtỳx ri ijamaxpêr o:

–Nà ixte Mojes kot Tĩrtũm nhỹ hã kapêr kôt amnhĩ nhĩpêx o ixpa jakamã koja Tĩrtũm ja hã ixpumu nê ixto hkra.

Anhỹr tã nom ja kot anhỹr kêt. Na htem amnhĩ krã hkôt tanhmã ri amnhĩ nhĩpêx to ho pa nhũm Tĩrtũm ãm ja hã mẽ omu nê ãm hã mẽ omu nê mẽ ho hkra hkêt nê. Nom koja mẽ Kris kôt amnhĩ xunhwỳ nhũm ja hã mẽ omu nê mẽ ho hkra kurê kumrêx. Jakamã ixte Kris kôt amnhĩ xãm ã ixpumunh kôt pix mã na pre ixto hkra nê inhmex ã ijarê.

¹⁰ Hãmri pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupỹm htĩr

nē hihtỳx nē àhpumunh tỳx o tanhmã amnhĩ nhĩpêx to ho pa. Tã ijaxwỳja inhmã uràn ã amnhĩ nhĩpêx anhỹr prãm. Nē inhmã uràk nē amnhĩ xà htỳx kutã amnhĩ to htỳx nē ixpa hprãm. Mē kot hã ixpĩr mã tã pa uràk nē Tĩrtũm kapêr kaga hkêt nē ãm kôt pix mã amnhĩ nhĩpêx o ri ixpa rãhã uràk nē hã ty. Ja na inhmã ho anhỹr prãm.

¹¹ Kê Tĩrtũm kot hipêxta pyrà nē akupỹm ixto ixtĩr pa wa kuri ixtĩr tũm nē ixpa ho ixpa.

¹² Inhmã Kris kôt pix mã amnhĩ nhĩpêx o ixpa hprãm tỳx kumrêx. Kormã ixte hkôt amnhĩ nhĩpêx o inhmõr nē kormã hatur xàm mēnh kêt tã inhmã tokyx hatur xàm mēnh prãm. Na pa ã inhmã amnhĩ nhĩpêx anhỹr prãm tỳx kumrêx.

Nē na pa hte ixte amnhĩ tomnuj kêt ã amnhĩ to jarkrar o ri ixpa hkêt nē. Na pa hte arĩ tõhã tanhmã amnhĩ tomnuj to nom inhmã ã amnhĩ nhĩpêx anhỹr prãm kêt. Nē na pa kormã ixpĩr hã Kris kot amnhĩ nhĩpêx mar o inhmõr nē hatur xàm mēnh kêt tã inhmã hkôt amnhĩ nhĩpêx o inhmõr nē tokyx hatur xàm mēnh prãm. Ja kaxyw na pre Jejus Kris amnhĩ kaxyw ixta.

¹³ Na pa hte mẽ akurom papxpix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nē. Nom ra ixte tanhmã amnhĩ tomnuj to ho ixpata pa axte kãm ijamaxpêr kêt nē. Te amnhĩ katut kôt ixte rēnh par pyràk o hipêx nē axte kãm ijamaxpêr kêt nē. Nē Jejus kãm hprãm xà hkôt pix mã amnhĩ nhĩpêx prãm xàj amnhĩ kaxyw kãm ijamaxpêr o ri ixpa.

¹⁴ Koja nhỹrmã Tĩrtũm ixpê Kris kwỳ hã amnhĩ wỳr ixwỳ nē inhmã:

—E amnẽ ixwỳr api Pawre. Kot kaj jarãhã amnẽ mẽ ixwỳr api.

Anhỹr o nhỹrmã inhmã kapẽr jakamã na pa hte amnhĩ tã ãm pix jamãr rãhã ho ixpa. Pê ra Jejus kot amnhĩ nhĩpêx piitã omunh par o mō. Nà kot paj gaa nẽ hkôt pix mã amnhĩ nhĩpêx mex o ri ixpa.

¹⁵ Kwa kêr pu mẽ pahpiitã ã pajamaxpêr anẽ. Jao amnhĩ wỳr hamãr pê hkôt pix mã amnhĩ nhĩpêx o ri papa. Mẽ pahpiitã mẽ pahpê Kris kwỳ kênã. Nom kot ka mẽ atō ja kaxyw tee ri amnhĩ kukamã ajamaxpêr nẽ ajamaxpêr o:

—Nà tanhmã kot paj we amnhĩ to nẽ Jejus kôt amnhĩ nhĩpêx mex rãhã o ri ixpa? Ja kaxyw ixãhpumunh tỳxre hã. Anẽ.

Hãmri nẽ ã ajamaxpêr anhỹr o apaja apê hihtỳx japêr. Hã koja Tirtũm hprĩ hã tanhmã amã ja kukamã harẽnh to nẽ kaxyw ato axihtỳx ka ixpyrà nẽ hkôt pix mã ri amnhĩ nhĩpêx o apa.

¹⁶ Jakamã kêr pu mẽ ãm Tirtũm kãm hprãm xà hkôt pix mã tanhmã kãm amnhĩ nhĩpêx to ho papa. Ra mẽ pahte hkôt amnhĩ nhĩpêx o papa xàja kôt pix mã arĩ amnhĩ nhĩpêx rãhã ho papa.

¹⁷ E Kris kôt ixtō nẽ ixtōxjaja. Na pa ra mẽ anoo mã Jejus kôt tãm ri amnhĩ nhĩpêx o ri ixpa. Tã kêr ka mẽ ja hã ixpumu nẽ ixpyrà nẽ hkôt amnhĩ nhĩpêx o ri apa. Hãmri nẽ nhỹri mẽ kot ixpyrà nẽ ã amnhĩ nhĩpêx anhỹr xwỳnhjê hõ pumu nẽ uràk nẽ ã amnhĩ nhĩpêx anẽ.

¹⁸⁻¹⁹ Jejus kot mẽ pamã mẽ pahte amnhĩ tomnuj mỳrapê pĩ kahpa hã mẽ panê htykja nhũm mẽ ra ohtō nẽ hprĩ hã mar tã hkôt amnhĩ xunhwỳr kêt nẽ. Mẽ kãm ã kot amnhĩ nhĩpêx anhỹrja ã mar prãm

nõkati. Jakamã te mẽ kãm Jejus kurê xwỳnh pyræk. Na htem hã hpijaàm kêt kãm tanhmã ri amnhĩ tomnuj to ho pa. Nẽ kãm amnhĩ mex pix prãm. Nẽ tanhmã amnhĩ tomnuj to nõ ja hã amnhĩ pumu nõ hkĩnh nõ. Nom tee ri ja hã amnhĩ pumu nõ hkaprĩ nõ ri pa hkêt nõ. Tã ã mẽ kot amnhĩ nhĩpêx anhỳr jakamã koja mẽ nhỹrmã ma mẽ kot amnhĩ xà htỳx kamã hamak o pa tũm xàta wỳr hapêx. Nà koja mẽ ã amnhĩ nhĩpêx anẽ. Ra ixte mẽ amã ja hã mẽ harẽnh rax tã pa axte mẽ amã mẽ harẽ. Inhmã mẽ hkaprĩ hkôt na pa hte xatã mẽ amã ja hã mẽ harẽ.

²⁰ Kêt mẽ papajaja mẽ kurom mẽ pahpê kaxkwa nhõ xwỳnh nom kormã. Koja nhỹrmã Jejus Kris akupỳn mẽ pahwỳr kaxkwa rũm wrỳ. Mẽ papytãr xwỳnh maati Pahihtija akupỳn wrỳ hãmri nõ ma akupỳm amnhĩ kôt mẽ pahto api. Jakamã na pu htem arĩ pahkĩnh pê amnhĩ wỳr kamã pajamak rãhã ho ri papa.

²¹ Na pu htem jar pyka ja kamã Jejus kĩnhã paxirerek nõ pahpunuj nõ ri papa. Nom koja nhỹrmã akupỳn mẽ pahwỳr wrỳ hãmri nõ amnhĩ pyrà nõ mẽ pamã mẽ panhĩ nyw gõ pu mẽ uræk nõ paxihtỳx kãm pahtĩr tũm nõ papa ho papa. ã kot mẽ panhĩpêx anhỳr kaxyw àhpumunh o àhpumunh. Tã koja àhpumunh tỳx kãm mẽmoj piitã ho amnhĩptãr pa. Pu mẽ pahpiitã hkôt amnhĩ nhĩpêx mex rãhã ho ri papa.

4

*Pawre kot mẽmoj tã mẽ kãm karõ
Epes 4.3; Piripos 2.2; Korosẽ 3.15*

¹ E Kris kôt ixtõ nẽ ixtõxjaja. Inhmã mẽ ajapêê. Na pa hte mẽ ato ijamak o ixkrĩ nẽ mẽ amã ijamxpêr nẽ ixkĩnh nẽ. Nẽ jar mẽ pahkwỳjê mã mẽ ajarênh o ri ixkrĩ. E kwa kêr ka mẽ arĩ Pahihti kapêr kôt pix mã mãn amnhĩ nhĩpêx mex rãhã ho ri apa.

² Nẽ wa ka Ewox mẽ Sĩxika wa. Na ka xep hte wa mẽmoj tã axpên kamã agryk rãhã ho ri apa. Kwa wa ã amnhĩ nhĩpêx anhỹrja mã anhũre nẽ tãm axpên nhĩpêx. Pahihti Kris kôt war ate axpên to war atõx kênã kot ka kêt wa axtem nẽ mẽmoj tã axpên kamã agryk o ri apa.

³ Nẽ ka Xikitre. Apê ixkràmnhwỳ mex jakamã kêr ka axpên tã wa nita wa kãm akapêr kãm axihtỳx nẽ kê war ama nẽ akupỹm tãm axpên nhĩpêx. Na pre wa ra Kremên mẽ hkwyjê mẽ hpimràatã ixpyrà nẽ Jejus kot tanhmã mẽ panê amnhĩ nhĩpêx to hã harênh o ri pa. Tĩrtũm nhõ kagà kamã mẽ hixi piitã hikwỹ. Mẽ pahtĩr tũm nẽ mẽ papa mã xwỳnhjaja ra Tĩrtũm nhõ kagà kamã mẽ panhĩxi jaxwỳr par.

⁴ Nẽ kêr ka mẽ apê Pahihti hkwy hã akĩnh nẽ ri apa. Mẽ ate ã amnhĩ nhĩpêx anhỹr o apaja na pa inhmã hprãm tỳx jakamã kot paj axte mẽ amã harê. Kwa kêr ka mẽ akĩnh nẽ ri axpên kôt apa.

⁵ Pahihti Jejus ra akupỹn mẽ pahwỳr nojarêt jakamã kêr ka mẽ kutêp mẽ piitã ri mẽ ho mex o ri mẽ hkôt apa.

⁶ Nẽ kêr ka mẽ tee ri amnhĩ kukamã ajamxpêr o ri apa hkêt nẽ. Arĩ amnhĩ to Tĩrtũm wỳr rãhã nẽ. Kot ka mẽ mẽmo arĩgro hã apê amrakati japêr nẽ tee ri ja hã amnhĩ pumu nẽ amnhĩ to awỳ kê mẽ ama nẽ mẽ amã mẽmoj gõ. Rỳ mẽ ate mẽmoj

tã hwÿr xwÿnhta tanhmã mẽ amã hipêx to ka mẽ amnhĩ tã omu nẽ kãm:

—Nà ãm hãmri na ka ã inhĩpêx anẽ nẽ inhmã ja gõ Tĩrtũm. Amex o amex.

Anhÿr o kãm amnhĩ jarẽ.

⁷ Kot kaj mẽ ã amnhĩ to hwÿr anhÿr o ri apa nhũm tanhmã mẽ akrã hto ka mẽ mẽ apê Jejus Kris kwÿ hã ajamakêtkati nẽ axãmnhĩx ri apa. Hãmri nẽ mẽmoj tã tee ri amnhĩ kukamã ajamaxpêr o ri akaprĩ nẽ apa hkêt nẽ. ãm akĩnh rãhã ri apa. Tĩrtũm kot tanhmã mẽ pahto nhũm mẽ pajamakêtkati nẽ ri mẽ papaja mẽ pahte amnhĩ tã omunh kêt. ãm tapxipix kot ã mẽ panhĩpêx anhÿr kukamã àhpumunh tÿx.

⁸ E Kris kôt ixtõ nẽ ixtõxjaja. Nà ixkapêr ã kagà jatur xà na ja. Kwa kêr ka mẽ ixujarênh mar tÿx nẽ hkôt amnhĩ nhĩpêx o apa.

Nẽ kêr ka mẽ axàpênh mex pix kukamã ri ajamaxpêr o apa.

Nẽ mẽmoj mex pix kukamã ri ajamaxpêr.

Nẽ axpên mã akapêr mex pix kukamã ri ajamaxpêr.

Nẽ akatàt kôt akapêr xàptàr pix o axpên mã akapêr hkukamã ri ajamaxpêr o ri apa.

Nẽ tãm ri amnhĩ nhĩpêx hkukamã mãn ajamaxpêr o ri apa.

Nẽ mẽ piitã ri mẽ ho mex o apa hkukamã ajamaxpêr.

Nẽ mẽ akapêr mex pix kukamã mãn ajamaxpêr o ri apa.

E kêr ka mẽ ã amnhĩ nhĩpêx anhÿrja kukamã ajamaxpêr rãhã ho ri apa.

⁹ Nē mẽ akôt ixpare ri na pa pre Kris kôt amnhĩ to mex pix nē tãm ixkapêr o ri ixpa. Tã kêr ka mẽ ixpyrà nē ã amnhĩ nhĩpêx anê. Koja Tĩrtũm ja hã mẽ apumu nē mẽ akôt ri pa ho pa. Kêp mẽ pamã mẽ paxàmnhĩx pajamakêtkati xà nhõr xwỳnh na.

Mẽ kot Pawre hwỳr mẽmoj mẽnh nhũm kot omunh nē hkĩnh ã harēnh

Sikũn Korĩt 11.7-9; Piripos 1.5

¹⁰ Nē amnepêm na ka prem xatã tanhmã ixto mex to ho ri apa. Tã axte ã inhĩpêx anhỹr prãm nom mẽ apê awry nē ixpa jakamã ka xep prem tee ri tanhmã ixto mex to hkukamã ajamaxpêr kapry. Tã jar mẽ kot ijaxàr ã ijarēnh ma nē ixwỳr Eparoxit mẽ nhũm man ixwỳr mō nē inhmã kàxporeta gō. Mẽ amã ijapê hã ixwỳr amē pa omu nē ixkĩnh tỳx nē. Nē ixkĩnh kãm Tĩrtũm mã mẽ ajarē. ãm hãmri na ka prem ixwỳr amē.

¹¹⁻¹² Nē na pa hte tanhmã ixkute htã arĩ ixkĩnh nē ijamakêtkati nē ri ixpa. Jakamã kot pa mẽmo arĩgro hã ixpê amrakati nē inhmã prãm japêr tã no ãm tee ri amnhĩ kukamã ijamaxpêr o ri ixkaprĩ hkêt nē. Arĩ ixkĩnh rãhã ixàmnhĩx ri ixpa. Rỳ pa inhõ mẽmoj rax japêr nē mãânēn ixkĩnh nē ixàmnhĩx ri ixpa. Na pa pre tōhã inhõ rax nē ixpa. Nē tōhã inhõ hkêt nē ixpa. Tã arĩ ixkĩnh rãhã nē ixpa ho ixpa.

¹³ Na hte Kris mẽmoj piitã hkukamã ixto ixihtỳx pa ỹ hã mẽmoj kutã ixihtỳx nē ixpa. Jao mẽmo arĩgro hã inhmã prãm tỳx nē ri ixpa htã ỹ hã kutã ixihtỳx nē ixàmnhĩx ri ixpa.

14 Tã jar ixpunuj nẽ ixkrĩ ka mẽ ijarẽnh ma nẽ ixwỳr kàxpore hkwỳ rẽ. ãm hãmri na ka prem ixwỳr arẽ.

15 Amnepêm na pa pre mẽ anhõ pika pê Masetõn rũm ixkato nẽ mẽ piitã mẽ kãm Jejus kot tanhmã mẽ panê amnhĩ nhĩpêx to hã harẽnh o ri ixpa ka mẽ xatã ixwỳr kàxpore hkwỳ rẽ pa ho amnhĩm ixujaprõr o ri mẽ hkõt ixpa. Mẽ apê Piripos kamã Kris kõt ixtõ nẽ ixtõx pixjaja na ka prem ã inhĩpêx anẽ. Krĩ hkwỳ kamã Kris kõt mẽ pahkwỳjaja na mẽ akĩnhã ã inhĩpêx anhỹr kêt nẽ. ãm mẽ kapxipix na ka pre ã ixto mex anẽ.

16 Tesarõn kamã ixpare ri na pa pre ixpê am-rakati kumrẽx nẽ ri mẽ hkõt ixpa ka mẽ xatã ixwỳr kàxpore hkwỳ rẽ pa pre ho amnhĩm ixujaprõr rãhã ho ri mẽ hkõt ixpa.

17 Nom mẽ ate ixwỳr hkwỳ rẽnh kaxyw mẽ akamã ijamak o ri ixpa hkêt nẽ. Rỳ ijamaxpěr o:

—Ko. Koja Piripos nhõ xwỳnhjaja ijarẽnh ma nẽ kãm ixkaprĩ nẽ ixwỳr kàxpore hkwỳ rẽnh japêr.

Anhỹr o mẽ akukamã ijamaxpěr kêt nẽ. Nom ra mẽ ate ixwỳr hkwỳ rẽnh jakamã koja Tĩrtũm ja hã mẽ apumu nẽ mẽ ato mex nẽ. ã mẽ pahte axpẽn kutã panojarêt anhỹrja na kãm hprãm.

18 Tã nhũm Eparoxitja ham mẽ arũm kato nẽ man ixwỳr mõ nẽ inhmã kàxporeta gõ. Kwa na ka mẽ inhmã õr rax nẽ. Koja tokyx ixpê hapêx kêt pa kritpêm ho ixàpkur o ixkrĩ. Tã ot pa ho kõta nẽ tanhmã hkre kamã kute pumunh xà hkõt hã kagà nẽ mẽ awỳr kumẽ. Nà mẽ ate ixwỳr axàmnhõrta na Tĩrtũm omu nẽ ixtã mẽ apumu nhũm ja kãm mex

kumrẽx. Te mẽ kot mẽ hkuxwaxà hpãr nhũm mẽ kãm mexta pyræk nhũm ja kãm mex nẽ.

¹⁹ Nà koja Tĩrtũm mẽ apê Jejus Kris kwỳ hã mẽ amã mẽ ate mẽmoj to presija xà nhõr rãhã ho pa. Mẽmoj piitã kêp õ kẽnã.

²⁰ E kêr pu mẽ Mẽpanhĩpêêxà maati Tĩrtũm mã mex o mex ã harẽnh rãhã o papa. Ja na inhmã hprãm.

²¹⁻²² Nẽ ot pa mẽ jar ixpiitã mẽ apê Jejus Kris kôt mẽ ixkwỳjê hwỳr kagàja kamã mẽ ixpẽr mẽ. Mẽ ixpyrà nẽ mẽ apê Tĩrtũm kra hã. Pa nẽ Kris kôt mẽ pahtõ nẽ mẽ pahtõxjaja. Nẽ Rõm nhõ pahi mã mẽ àpênh xwỳnh kot Kris kôt amnhĩ xunhwỳr xwỳnhjaja mããnẽn. ãm jar mẽ ixpê Tĩrtũm krajê piitã pa mẽ awỳr ixpẽr mẽ.

²³ E kê Pahihti Jejus Kris mẽmoj to mẽ akutã nojarêt rãhã nẽ. Jao mẽ ato mex o pa.

Tã ãm ja pix. Ixpê Pawre na pa mẽ awỳr kagàja nhĩpêx nẽ kumẽ.

Tĩrtũm kapēr ã kagà nyw
New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

383a4e22-34cd-505f-9cc2-2f9921e7aa9f